



Pisortat ataatsimoortumik allaffissornerisa aaqqissugaanerannut atatillugu naliliinissamut ataatsimiititaliarsuarmik pilersitsisoqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut. Maanna suliassaasut aallaavigalugit allaffissornerup annertussusaa ataatsimiititaliarsuup nalilersussavaa, suleriaatsit sunniuteqarluarnerusut pilersinnissaannut immikkoortorta qarfiillu suliassa qarfiillu (sektorit) akimorlugit suleqatigiinnerup pitsanngorsaaviginissaanut periarfissat misissussallugit, kiisalu allatut aaqqissuussinissamut periarfissanik siunnersuuteqarluni. Siunnersuutini tamani inatsisit ingerlatsinermut tunngasut qasukkartinneqannginnissaat aallaaviussaaq. Ataatsimiititaliarsuaq inunnit sektorinit assigiinngitsuneersunit inuttaqassaaq, tassa pisortat sektoriineersut aamma namminersortut sektoriineersut ilaasortat misilittagaqartut amerlaqatigiissallutik. Ataatsimiititaliarsuaq assigiinngissitaartuneersunit ilaliussanik sulisitaqassaaq, sulininilu ukiut marluk iluanni naammassissallugu. Tamatuma kingorna ataatsimiititaliarsuup innersuussutai Inatsisartuni politikkikkut suliarineqassapput.

(Inatsisartunut ilaasortat Múte B. Egede, Inuit Ataqtigiit aamma Naaja H. Nathanielsen, Attaviitsoq)

(Siullermeenera)

Pisariaqaqqilerpoq pisortat ingerlatsiviutaatitta oqaluusereqqinnissaat, angissusaat aamma pisortat suliffiutaanni suleriaatsit pisariuneri taamaattumik siunnersuuteqartumut qujanaq oqallinneq aallartimmagu.

Uangutsinnut pingaaruteqarpoq allaffissornikkut pisariillisaaneq aamma innuttaasunik kiffartuussineq pitsaanerusoq. Pisortat suliffeqarfiutaat politikerinit aqunneqarput inernerusarporlu assigiinngitsunik ilaannikkullu akerleriinnik anguniagaqartarneq, pisortani sulisunut imaannaanngissinnaasartunik. Aallaaviorpasippoq ingerlatsiviup eqqarsartaasia, innuttaasut ammaffiginissaat tusarnaarnissaallu taamatullu pisariaqartitaat pinnagit.

Tassa ajornartorsiut imaannaanngitsoq uani kalluarneqarpoq.

Uttorsinnaasariaqarparput nuussuingaangatta, pisariillisaangaangatta imaluunniit allannguingaangatta tamanna innuttaasunut qanoq kinguneqartarnersoq. Pisortat ikiorsiissuteqartarneranni tamanna anguniagaangunarmat.

Misilikkusunnerusarparput inatsisiliornikkut ajornartorsiutinik qaangiiniartarneq. Pisorta qarfinni aqutsisut nukittunerit pisariaqartippagut isiginerullugit aqutseriaatsit aamma politikerit eqaannerusumik periuseqarnissaanngu piunasaqaatit kiisalu innuttaasunik sullissisut tusaanerusariaqarpagut.



Nassuerutigiinnariartigut Kalaallit Nunaanni pisortat ingerlatsiviat annertoorujussuummat aamma angusassamik toraagaqarluta annikillisarnissaa sulissutigisariaqaralaratsigu kiisalu pisariillisaanissanut pilersaarutit nussorlugillu uummarissartariaqaratsigit.

Qitiusumut nuussigaangatta pingaaruteqarluinnartarpoq akisussaatsutsip agguarnerata ersarissuunissaa aammali qitiusumut nussuinermi sinaakktissani inissaqartariaqarmat iluamik piviusumillu eqqarsarnissaq, tassa akisussaassuseqarluni kiffaangissuseqarnerup inissaqartinnissaa.

Peqataanik aamma pingaaruteqarluinnarpoq pisortani suliffeqarfinnut aaqqissuussinitsinni kajumissaasiisassagatta missingersuutit malinneqartaqqullugit, sipaartoqartaqqullugu, sukangasuumik pitsaasumillu aqutsisoqaqqullugu aamma aaqqissuussineq eqaatsuutittariaqarparput sulisut sulilluarneroqqullugit aamma sulisinnaaqqullugit immikkut nutaaliornissaq, pitsaasumik sulinissaq il.il. inissaqartillugit.

Taamaattumik isumaqarpugut anguniartariaqartoq aqutseriaaseq ammanerusoq pisariinnerusorlu, sulisut innuttaasunik sullissisut tusaaneqaqqullugit, akuutinneqaqqullugit aamma ajunngitsorsiaqartinneqarsinnaaqqullugit tunniusimallutik atorfimmik pigiinnarnissaannut kissaateqartilerlugit - sullivinni amerlavallaani sulinermi avatangiisit ajorpallaaqaat aamma pisortat suliffeqarfiini sulisut paarlagaiaappallaarput. Tamanna ajorluinnarpoq.

Pillarneqarnissamut ernumaneq; aamma aningaasartuutikillisaanissamut tunisassianillu siuarsaanissamut aningaasaliissutinik ukiumiik ukiumut nuussisarnissamut periarfissat killeqarpallaarnerisa pisortaqaarfinni ineriartornissaq noqinneqarpoq aamma suliarujussuusarpoq ilinniartit nunamili maani innuttaasut akornanni aporfiit piiarnissaat.

Politikerinit uparuarneqarissamut ernumaneq imaluunniit piginnaanikinneq pissutaallutik politikerit anguniagaat ataqatigiissumik mangiarnagit suliarineqarsinnaaneq ajorput - aaqqissuussineq pissutaalluni sivisunerpaamik sulisinnaasut ajunngitsorsitinneqartarmata imaluunniit politikerinut pisortarisamulluunniit qaninnermut annertuumik "iluareqqusaarneq" pisarmat. Naak sulisut pisariillisaanissamik, innuttaasunilluunniit kiffartuussinissamik eqqarsanngikkaluartut imaluunniit nammineerlutik pisariillisaanissaq suliarninnut ilanngunneq ajoraluaraat. Pilersaaruserneq tunngavigalugu sipaarutissanik piviusunngortitsiniarluni suliaqarneq politikikkut anguniakkanut akorngutaasariaqanngilaq - kisianni qitiutittariaqarput innuttaasut oqartussaaffiilluunniit kiffartuussinermik atuisussat.

Aamma ullumikkumut naleqqiullugu allarluinnarmik eqqarsartariaqarpugut.

Piumasaqaatit allanngorartuarneri, aqutsinermut malittarisassat, suliniutit, suliat ingerlanneranni piumasaqaatit allarpasuillu, pitsanngorsaananissanut piumasaqaatinut pinngitsoorsinnaanngisatsinnut pinngitsoortitsisartut pisortani sulisunut ilungersunartuupput



aamma Bloktilskudit mangiarneqartarmata saniatigullu malunnartunik allanik nammineq iseritaqarneq ajoratta, taava allatut ajornartumik immitsinnut erisartariaqartarpugut.

Pisortani ileqqunngortittariaqaraluarparput allannguinerit, nutaaliernerit il.il. tamarmik siunertaqartassasut pisariillisaanissamik, paasiuminarsaanissamik, aalajangersimasunik periuseqarfigineqassasut ajornanngippallu piginnaanernik qaffassaallutik. Kiisalu ajornanngippat aamma sipaarutissanik.

Allanquinissatta imarissavaat anguniakkat ikittut ersarissullu, suliassavinnut attuumassutillit, sunniutaat uuttortarlugit imaluunniit innuttaasunik kiffartuussinikkut.

Demokraatini Naalakkersuisut allannguutissatut siunnersuutaat ilalerpagut. Taamaasiorpugut Naalakkersuisut akissumminni tulleriaarlugit nassuiarmatigit ataqatigiissaarinerit qasserpiaat massakkut ingerlanneqarnersut.